

Vun driweriver

erscheint auf www.lenauheim.de

monatliche
Erscheinung

Juli 2024

von Helen Alba

Kerweiwäändl un Schlappetanz

Vor 50 Jahr is die Gschicht do jo wirklich vorkumm. De Klosi hat em Elfriede bei der Kerwei de Vorstrauss lezetiirt un der is hemgspillt gin. Also 40 Kerweiphaare sin mit der Blechmusik zum Elfriede seim Elternhaus maschiert, wu die Vorbereitunge fors Traktiere schun in vollem Gang ware. De Kerweizuch is uf der Damm maschiert un die war voller Scholle. Ufmol is jo es Elfriede uf e dicke Scholle getret, is umgeknackt un hat sich de Fuß verstaucht. Kann mer sich so e Malleer vorstelle? Die Vortänzerin hat nimi gehn kenne. Zwaa Kerweibuwe han se bis hem getraa. Dort war jetz die ganzi Familie rewellisch. Was erschter mache? De Leit antraan? Oder sich ums Elfriede kimmre?

Als erschetes is de Fuß in e Lawoor mit Essichwasser kumm, er war stark angeschwoll. Dernoh hat em Elfriede sei Vater sich ufs Bizikl gsitzt un is je gefahr de Fälscher/Sanitäter suche. Derweil is im Hof traktiert un getanzt wore. Wie de Fälscher beikumm is, hat der natierlich gsaat, Umschläch mit Bleiwasser mache un je ins Bett. Nit uftrete uf de Fuß! Alli in der Familie ware dischperat un de Klosi war ausser sich! Was gschieht jetzer ufm Baal? Am Kerweimontach? Em Elfriede sei Schwester war zwar schun verheirat, doch es hat owets ufm Baal die Vortänzerin gspillt während es Elfriede derhem bittri Träne gekrisch hat.

Doch for de Kerweimontach han sich die junge Leit was ausgedenkt, des ach hinghaut hat. Sie han e Lattewäändle mit Krepppapier ufgeputzt, es Elfriede in de Schlappe ufgelad un sin je mit der Vortänzerin zum Wertshaus. Dorte han se des sogar gschaft, des Wäändle bis in de Saal zu schiewe un es Elfriede hat drin sitze un zuschauen derfe. Noch heitzutach denke es Elfriede un de Klosi, die e Jahr druf gheirat han un jetz schun Rentner sin, oft an selli Kerwei, ans Wäändl un an de Uwing mitm verstauchte Fuß. Zwar koscht des se jetzt e Lächle, doch domols han se e harti Nuß zu knacke ghat!

Baure, Handwerker un Gstudierti

Vor 255 Jahr sin kumm die Ahne ins Banat
dort seßhaft gin, han gschuft, so staat un staat
ufgebaut e Dorf, Bogarosch genennt,
dort wu jeder jeden hat gekennt.

Sie han die Kerch gebaut, e Schul un ihre Hem,
Gemeindehaus, e Post, Vereine ware a gewenn.

Verarweit han die Baure guti, schwarzi Erd,
villi sin zu Wohlstand kumm, han ihre Feld vermehrt.

Anri han des Dorf mit ihrem Handwerk belebt,
es hat an nix gfehlt, jeder war uf was bestrebt.

Ach uf sei Gstudierti is Bogarosch stolz.

Zwar ware die e bissl meh noh nowlem Holz,
doch han se der Gemeinde Ehr gemacht,
han sich's Keppche angstrengt Tach un Nacht.